

Na osnovu člana 15. Stav (1) alineja 2. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“ br. 49/06 i 51/09), člana 25. Statuta Općine Centar Sarajevo i Odluke o izvršenju Budžeta Općine Centar Sarajevo („ Službene novine kantona broj 2/18), Općinski načelnik donosi

## PRAVILNIK

### O POTICAJU ZAPOŠLJAVANJA MLADIH SA PODRUČJA OPĆINE CENTAR SARAJEVO

#### Član 1.

##### (Predmet)

Ovim Pravilnikom o poticaju zapošljavanja mladih sa područja Općine Centar Sarajevo (u daljem tekstu: Pravilnik) uređuju se uslovi i postupak za ostvarivanje prava na subvencioniranje poslodavaca za slučaj zapošljavanja mladih nezaposlenih osoba sa područja Općine Centar Sarajevo, izvori sredstava, kriterij za raspodjelu sredstava, nadzor nad korištenjem sredstava kao i druga pitanja vezana za odgovorno raspolaganje sredstvima koja se za ovu namjenu izdvajaju iz Budžeta Općine Centar Sarajevo.

#### Član 2.

##### (Definicije pojmova)

**Nezaposlena osoba** u smislu ovog Pravilnika je radno sposobna osoba starosti do 35 godina, koja je prijavljena nadležnoj službi za zapošljavanje i koja ima prebivalište na području općine Centar Sarajevo najmanje tri godine.

**Poslodavac** je fizičko ili pravno lice iz privatnog sektora koje može koristiti sufinansiranje pri zapošljavanju u smislu ovog Pravilnika a koji zapošljava nezaposlenu osobu i čije sjedište je na području Općine Centar Sarajevo.

**Subvencija** je oblik finansijske pomoći iz Budžeta Općine Centar Sarajevo koji se daje poslodavcu u privatnom sektoru na ime refundiranja iznosa propisanih doprinosa iz plaće i na plaću za period od 12 mjeseci.

#### Član 3.

##### (Uslovi za ostvarivanje prava na subvenciju)

(1) Pravo na subvenciju za zapošljavanje u skladu sa ovim Pravilnikom može ostvariti poslodavac koji ispunjava sljedeće uvjete:

a) Ima sjedište firme na području Općine Centar Sarajevo

b) U skladu sa Zakonom o radu zaključi ugovor o radu sa nezaposlenom osobom iz člana 2. stav 1. ovog Pravilnika.

c) Isplaćuje radnicima plaće u skladu sa važećim propisima uključujući dospjele poreze i doprinose za obavezna osiguranja;

d) Da do dana objave javnog poziva nije smanjio broj zaposlenih osoba sa liste osiguranih osoba poslodavca, osim u opravdanim slučajevima (otkaz na vlastiti zahtjev radnika, penzionisanje, nesposobnost za rad i sl.)

e) Da nije pod stečajem, niti je predmet stečajnog postupka, da nije predmet postupka likvidacije, odnosno da nije u postupku obustavljanja poslovne djelatnosti;

g) da je izmirio dospjele obaveze u vezi sa plaćanjem direktnih i indirektnih poreza.

(2) Pravo na subvenciju ne mogu ostvariti oni poslodavci čije djelatnosti se odnose na djelatnosti ugostiteljstva, proizvodnje oružja i vojne opreme, proizvodnje duhanskih proizvoda i alkoholnih pića, primarne poljoprivredne proizvodnje, otvaranja kasina i drugih igara na sreću.

#### Član 4.

(Izvor sredstava i visina subvencije)

(1) Sredstva za subvenciju osigurana su u Budžetu Općine Centar Sarajevo, na ekonomskom kodu 614533 u iznosu od 56.000,00KM.

(2) Poslodavac koji zaposli nezaposlenu osobu iz člana 2. stav 1. ovog Pravilnika, na period od 12 mjeseci sa VSS ima pravo na refundiranje troškova propisanih doprinosa iz i na plaću, obaveze za porez i doprinose u ukupnom iznosu od 750,00 KM.

(3) Poslodavac koji zaposli nezaposlenu osobu iz člana 2. stav 1. ovog Pravilnika, na period od 6 mjeseci sa SSS ima pravo na refundiranje troškova propisanih doprinosa iz i na plaću obaveze za porez i doprinose u ukupnom iznosu od 490,00 KM.

#### Član 5.

(Postupak za dodjelu subvencije)

(1) Javni poziv za dodjelu subvencije poslodavcima o poticaju zapošljavanja mladih sa područja Općine Centar Sarajevo se objavljuje putem web stranice Općine Centar Sarajevo [www.centar.ba](http://www.centar.ba).

(2) Javni poziv ostaje otvoren do utroška raspoloživih sredstava, tj. do potpisivanja ugovora u vrijednosti raspoloživih sredstava.

(3) Sadržaj javnog poziva, dokumentaciju koju je potrebno priložiti uz prijavu i ostalo priprema Općinski načelnik putem Službe za privredu i lokalno ekonomski razvoj kao nadležne službe.

(4) Po redosljedu prijava poslodavaca nadležna Služba odmah pristupa otvaranju dostavljene dokumentacije pristigle po Javnom pozivu, te pregleda validnost dokumentacije i ispunjavanje uslova utvrđenih ovim Pravilnikom, nakon čega Općinski načelnik sa poslodavcem zaključuje ugovor o subvencioniranju.

(5)Obrazac zahtjeva za subvenciju će utvrditi Općinski načelnik putem nadležne Službe i isti će biti dostupan na web stranici Općine Centar Sarajevo [www.centar.ba](http://www.centar.ba).

## Član 6.

(Trajanje radnog odnosa sufinansirane osobe)

Radni odnos zaposlenika čije se zapošljavanje subvencionira traje koliko i period za koji se osigurava subvencija i još najmanje isti period nakon isteka tog roka.

## Član 7.

(Obaveze poslodavca koji koristi subvenciju)

(1)Poslodavac koji koristi subvenciju u skladu sa ovim Pravilnikom, za vrijeme trajanja perioda za koji prima subvenciju, ne može smanjiti broj zaposlenih osoba, u odnosu na broj zaposlenih koji je imao na dan objave Javnog poziva, osim iz razloga više sile (elementarne nepogode, požar, izmjene propisa koji direktno utiču na poslovanje poslodavca), penzionisanja ili nesposobnosti za rad.

(2)Poslodavac koji novom zaposleniku isplaćuje veći iznos propisanih doprinosa na plaći i iz plaće, dužan je obračunavati i uplaćivati razliku iznosa doprinosa u odnosu na iznos koji se subvencionira.

(3) Poslodavac je dužan Općini Centar Sarajevo dostaviti kopiju ugovora o radu i kopiju prijave na obavezna osiguranja (obrazac prijava/odjava JS 3100) prije potpisivanja ugovora.

(4)U slučaju raskida ugovora o radu sa sufinansiranom osobom, tokom perioda za koji se osigurava subvencija, poslodavac je dužan odmah o tome obavijestiti davaoca subvencije Općinu Centar Sarajevo te mora u roku od 15 dana od dana nastanka te okolnosti zaključiti ugovor o radu sa drugom nezaposlenom osobom koja ispunjava uvjete navedene u članu 2. ovog Pravilnika, na preostali period ugovorne obaveze, kao i obrazac JS 3100.

## Član 8.

(Ograničenja u pogledu korištenja prava)

(1)Poslodavac koji koristi sredstva poticaja u smislu ovog Pravilnika, ne može za istu osobu koristiti mjere aktivne politike u zapošljavanju koje se provode prema posebnom propisu, niti po toj osnovi ostvariti druga prava.

## Član 9.

(Obaveze poslodavca u slučaju neispunjavanja ugovorenih obaveza)

(1)Ukoliko u periodu trajanja radnog odnosa zaposlenika čije se zapošljavanje subvencionira nastupe okolnosti usljed kojih poslodavac ne ispunjava neki od propisanih uslova iz člana 3. Pravilnika, isti gubi pravo na subvenciju te je dužan u roku od 30 dana od dana prestanka ispunjavanja uslova obračunati i uplatiti Općini Centar Sarajevo iznos u visini ukupno iskorištenih sredstava subvencije.

(2)Poslodavac gubi pravo na subvenciju i ukoliko u toku korištenja iste smanji broj zaposlenika u odnosu na broj zaposlenika propisan članom 3. stav 1. Tačka d) Pravilnika.

(3)Povrat isplaćenih sredstava subvencije u slučaju neispunjavanja uslova od strane poslodavca garantira se bjanko potpisanom i ovjerenom mjenicom sa naznakom „bez protesta“ koju je poslodavac dužan dostaviti zajedno sa mjeničnom izjavom – ovlaštenjem za popunjavanje mjenice i bjanko potpisanim i ovjerenim nalogom za plaćanje, prilikom zaključivanja ugovora o subvencioniranju.

## Član 10.

(Obračun subvencija)

(1)Refundacija sredstava za onog poslodavca sa kojim je zaključen ugovor o subvencioniranju će se vršiti na način refundiranja ugovorenog iznosa za protekli mjesec do isteka ugovorene obaveze subvencioniranja.

(2)Poslodavac je u obavezi da najdalje pet dana od isplate plaće, nadležnoj službi dostavi specifikacije plaće i propisanih doprinosa ovjerenih u poreskoj upravi, ovjerene i potpisane platne liste osobe za koju se osigurava subvencija, uplatnice za pojedinačne isplate plaća a u slučaju zbirne uplate plaća kopije izvoda banaka iz kojih je vidljiva isplata pojedinačne plaće za sufinansiranu osobu.

## Član 11.

(Nadzor)

(1)Nadzor nad ispunjavanjem uslova za subvenciju propisanih ovim Pravilnikom za vrijeme korištenja subvencije, vršit će Općinski načelnik putem nadležne službe u saradnji sa Poreznom upravom na mjesečnoj osnovi.

Član 12.

(Važnost Pravilnika)

Ovaj Pravilnik važi do utroška obezbijeđeni sredstava u Budžetu Općine Centar Sarajevo, na osnovu potpisanih ugovora sa poslodavcima o poticaju zapošljavanja mladih sa područja Općine Centar Sarajevo.

Član 13.

(Stupanje na snagu)

Ovaj Pravilnik stupa na snagu narednog dana od dana objavljivanja na oglasnoj ploči Općine Centar Sarajevo.

Broj:10-49-242/18

Sarajevo,12.02.2018.godine



OPĆINSKI NAČELNIK  
Prof. dr. Nedžad Ajnadžić

The image shows a circular official stamp of the Centar Sarajevo Municipality. The stamp contains the text 'OPĆINA CENTAR SARAJEVO' and 'Bosna i Hercegovina'. Overlaid on the stamp is a blue ink signature. To the right of the stamp, the text 'OPĆINSKI NAČELNIK' and 'Prof. dr. Nedžad Ajnadžić' is printed.